

兩
浙
名
賢
錄

兩浙名賢外錄卷二目次

玄玄

五代

張昇真

厲歸真

譚峭

暨濟物

崔衣道人

馬氏二女

宋

管歸真

蔡華甫

張用成

王迥

謝寶

張無夢

沈敬

柯可崇

季隱子

梵公

唐子霞

范叔寶

林靈素

葉道士

受基

黃十公

王思廉

夏元鼎

聖道者

宋耕

周德方

孫新

杜昇

王嗣昌

蔡道像

白玉蟾

李爰

盧葆真

徐泰定

皇甫坦

葉文詩

陳明

章思應

李昇涕

朱希常

車四

趙道人

清音子

屈處仁

葉道出

沈若濟

葉梅卿

張復陽

賣柑老人

武元照

妙靖鍊師

唐廣真

蛇姑

陳氏

元

金正韶

陳嘉

劉太彬

張梯

徐弘道

丁野雀

周願真

块凡子

王應璩

劉雲心

周元和

羅少微

杜道堅

王壽衍

吳全節

阮日益

貝守一

明

彭素雲

張三丰

張守常

趙緣督先生

周思得

唐扶

丘駝

施舉

徐道彰

金九先生

郁存方

陸璣

俞大彰

閻蓬頭

葫蘆道人

潘自然

祝小仙

許源

兩浙名賢外錄卷二目次終

兩浙名賢外錄卷之二

東浙徐象梅仲和氏謨

靈山方覺蘧然閱

玄玄

五代 共六人

張昇真

張昇真錢唐人生有異相青骨方瞳形如瘦崔幼負篋從胡法師遊遇朱天師一見喜曰此子骨法應無度世遂授以要訣又受樊先生靈寶錄遂居真聖宮中歷覽

慈笈秘文吳越忠懿王俾主三錄齋事納土後宋太宗
選居太乙宮召對賜紫命校道書賜號元靜太師一日
見朱衣吏持符使速淨穢趨職久之沐浴返真體柔汗
泚火後得青黑色珠數升

厲歸真

厲歸真天台人嗜酒冬夏常單衣醉輒卧雪中飛雪四
積或高數尺而卧處氣蒸蒸然醒則振衣而起或卽卽
水浴氣蒸蒸起亦如卧雪時夏則赤脚走烈日中或亭
午輒瞪目對日抱膝坐四體微溫而無汗見者始知其

不凡又善水墨画人有求之者當其醉卽漬墨率率數筆而已他日展視之則山巒層叠林木蒼翠沼沚滌洞坡陀逶迤樓閣人物種種精妙有數日不能竟幅者人爭寶之以爲仙筆漢乾祐三年於中條山白日飛昇語人曰吾天台唐興縣人也隱隱入雲而沒後有人於大雪中見其赤脚度石梁擬呼之忽不見

譚峭

譚峭字景升海鹽人國子司業洙之子幼聰敏文筆清麗洙教以進士業峭乃獨好黃老道家言靡不精究一

旦告父出遊尋真訪道凡二十餘年始從嵩山道士得辟穀養氣之術由是日飲酒醉輒扶杖獨遊夏則服烏裘冬則衣絳布衫或卧風雪中人謂已斃視之氣休休然人遂謂之風狂每醉行吟曰線作長江扇作天靱鞋拋在海東邊蓬萊信道無多路只在譚生拄杖前後居南嶽煉丹丹成服之人水不濡人火不灼隱形變化人莫能測復入青城山化去峭嘗作化書宋齊丘竊其名爲已作久行於世今復稱譚真人化書云

暨濟物

暨濟物字子虛武林人味玄於大滌山中於精思院建
垂象樓三間積道書數千卷蓋笈琅函靡不窮討每講
貫玄宗聞者歎未曾有錢氏欲爲賜度弟子答曰樂靜
久矣不願有之一日忽語人曰吾將復往羅浮石樓矣
遂不知所之

鶴衣道人

鶴衣道人不知其名氏嘗醉卧於龍泉西鳳凰山下爲
里鄰所辱道人卽喫紙爲鶴乘之西去

馬氏二女

馬氏二女慶元人姊妹及笄父母將嫁之不肯問其故
曰紅顏易老吾欲以金丹駐之耳遂結廬於百丈山頭
每夜姊妹輒登山石上焚香拜求度世忽感真人密授
口訣姊妹按法修煉丹成俱白日乘鸞飛去至今山巔
有剪刀鏡臺遺跡

宋

共四十九人

管歸真

管歸真錢塘人少好道術嘗遇一青衣人欲傳點化之
術歸真問曰何時復還本質曰五百年歸真曰得無誤

五百年後人青衿敬其言。晚授紫府符法。祥符間行符救病立愈。禱雨虎龍飛躍。賜號正白真人。後承繡衣使者之召而化。趙抃記其事。

蔡華甫

蔡華甫名必榮。新昌人。幼警敏。略涉書史。爲縣從事。嘗遇異人。授以道術。遂能驅使鬼神。一日華甫偶出遊。有道人來其家。索酒持麻布囊。盛去華甫歸。而知其事。卽剪白紙二條。噴以符水。化二白蛇。凌雲去。投其醺壇。吸所懸佛像并樂器。道人哀懇。乃叱還之。女適張文煒。文

峰嘗過華甫見園中有二虎倉皇驚走華甫曰無懼我
當呼來卽馴伏於地如畜犬然暮年作冊將成使弟子
護之夜登索駝山坐石構榭上望烟色卓起卽歸取所
服之謂諸子曰我將遠遊矣遂尸解時有從子在天台
清溪見其乘青驪後二童子問之曰道友邀我游桐栢
宮耳言訖不見

張用成

張用成字平叔天台人少好學晚傳混元之道而未備
竊遊湖海孜孜訪問後入蜀遇劉海蟾授金液通丹火

候之訣因自號紫陽膏以所得作悟真篇八十一首時
有一僧修戒定慧自以爲得最上乘禪旨能入定出神
數百里間頃刻即到一日與紫陽相約同往揚州觀瓊
花遂同處一室相對瞑目而坐皆出神遊紫陽至時儻
已先至及歸各折一花爲記少頃欠伸而覺問僧瓊花
袖手兩空紫陽微笑從袖中拈出弟子問紫陽曰僧與
吾師同一神遊何以有折花之異紫陽曰我金丹大道
性命兼修是故聚則成形散則成氣所至之地真神見
形謂之陽神彼之所修欲速見功不復修命直修性空

故所至之地人見無復形影謂之陰神元豐五年夏跌坐而化住世九十九歲一好禪弟子誤用火化得舍利千百大者如芡實色皆紺碧羣弟子至相指謂曰此遺書所謂舍利耀金姿者也後七年劉奉真遇紫陽於王屋山留詩一首而去紫陽嘗自稱已與黃冕仲維揚于先生三人皆紫薇星號九皇真人因誤校勘切運之籍遂謫人間今垣中光耀可見者六星而已

王迥

王迥字子高錢塘人丰神秀朗飄飄然有出塵之想厭

薄功名結想泉石每歎陶葛稚川陶隱居吾之師也遂
并家徧遊名山川嘗遇仙人周瑤英携遊芙蓉城歸而
絕粒蔬東坡作歌以紀其事云後羽化去

謝寶

謝寶象山之烏村人父宗立無子禱於真武母夢雷震
而乳次年生寶有金光燭室之祥年數歲卽有靈異嘗
夢真武爲之沆腸溪上水至今有赤色天旱與羣兒東
鄉龍祈雨雨卽至舉鄉龍放溪上卽行數里觸石而沒
遂成深潭每陰雨鄉龍必見寶忽去與人耒田所芸處

常有雲氣覆其上。嘗於田中得一小魚，變成小龍，寶如
跨之遊水中。逮出而衣不濡。邑嘗大旱，令使祈雨，審嘆
母擊簸箕，旋紡車洒水。母如其言而忘洒水，則有雷，雨
無雨。後歸問其母，乃如囑爲之。雨遂沾足。元祐間，事聞
於朝，旌以金帛。皆不受。惟求東橋潭居焉。至建炎三年
三月，適召隣里故舊曰：吾明日辭世。還造化。三年後當
復生。幸勿葬。明日午果瞑目而逝。越三年，忽聞棺內有
聲。啓視之，容貌如生。忽火從頂出，自焚其尸。人見五色
烟中寶乘之冉冉騰空而去。

張無夢

張無夢字靈隱永嘉人號洪濛子幼入華山與种放劉
海蟾爲方外交師陳搏得微旨後廬於瓊行赤松導引
法間以修煉事形之歌詠題曰還元篇真宗召問長生
久視之術不對令講周易卽說謙卦真宗問曰何以獨
說謙卦無夢對曰方大有之時宜守之以謙真宗喜除
著作郎不受復召講還元篇答曰國猶身也心無爲則
氣和氣和則萬寶結有爲則氣亂氣亂則英華散此還
元大旨也賜處士先生號亦不受真宗親御宸翰作是

歌送行自丞相以下咸賦詩贈別既歸卽閉影潛山
精大道久之有悟泊然而化

沈敬

沈敬錢塘人少慕玄修雲遊湖海遇老姥於鍾山令汲
山泉煮石石柔餌之得仙煮十載不柔姥曰內蓄疑耳
此瓊樹中毒風故堅信吾言當自柔已而果然餌之竟
仙去

柯可崇

柯可崇永嘉人爲列真觀道士隱青嶂山架庵鑿石爲

觀乃陶貞白舊隱也其丹井石棋枰具存可崇更造絕頂築凌霄庵以居導引辟穀猛虎馴伏其傍人咸敬仰之後得道尸解

季隱子

季隱子名道華真定人晚遊義烏青巾褐裘與陳炯交而以奕棋自晦嘗曰自有宇宙以來其以奕開心而較勝負者不知其幾今安在哉隱居不食能飲酒嗜紙得紙卽燃爲杖以齒鍊之無紙與酒則默坐竟日或卽危垣之巔踞坐下視大笑嘗卧積雪中無寒色一旦語其

徒曰吾飲止今日耳死卽埋我及期踐逝衆埋之明年
金華呂道士元素過小茅山遇之語呂曰爲我謝宛陵
陳主簿蓋烟也

梵公

梵公慶元人遺其名氏初執役縣中爲值伯時縣令刑
峻梵用笏貯血匿杖中行杖見血刑者往往得從減一
日令見梵不履地三尺詢其故大異之無何遂飄然去
至白霍山廬其上一意修煉功成冠石曰千斤登山聞
山羽化去人稱爲梵公聖者

唐子霞

唐子霞餘杭人。潛心味道於洞霄宮。嘗著大滌洞天真境錄。自號渾淪子。宣和元年詔主杭州洞霄宮。明年盜起睦歙。破臨安。官吏散走。其徒亦治舟請行。子霞曰。吾被天子命主此宮。守死職也。公等第去。已而賊至。子霞正色叱之。遂遇害。門人程用光叩闕言狀。憫其忠。賻錢三十萬。勅令改葬。發土止一空棺而已。仙家所謂兵解者也。

范叔寶

范叔寶字子珉，遂昌人。少爲道士，落魄嗜酒，談人意外事，多奇中。酒醉多喜，畫牛一日忽性，詣郡守錢，竿曰：負公。画四幅，故來相償。画成，儼然就逝。將歛，得片紙於席間，書曰：庚申日，天帝召范子珉，蓋其卒日也。

林靈素

林靈素字通叟，永嘉人。初名靈噩，字歲昌。母懷妊二十四月，忽夜夢神人，緋袍玉帶，手執火筆，指母腹曰：暫借此居。次日乃生。五歲不能言。一日有道士踵門請見，附耳語，穆頃忽失笑而語。自是日記萬言，吐辭成章，嘗獨

登積穀山得異書於飛霞洞縱遊東京嘗同蘓東坡遊
瑞佛寺覽寺記數萬言默識無遺東坡大稱之入蜀遇
真人趙昇得神霄大法政和三年至京寓東太乙宮徽
宗夢跨白龍遊神霄宮會靈噩騎青牛而入覺而異之
命徐知常訪神霄事知常無以應或以靈噩進上召問
卿有何術對曰臣知天知人上見狀貌如夢中所見遂
賜名靈素號金門羽客冲虛通真達靈玄妙先生每侍
宴太清樓下見元祐奸黨碑靈素對之稽首上惟問之
對曰碑上姓名皆天上星宿臣敢不稽首因爲詩曰蘓

黃不作文章客童蔡翻爲社稷臣三十年來無定論不知奸黨是何人上以詩示蔡京京惶愧乞出是年五月大水臨城靈素奏請太子登城致拜是夕水退因上疏言國難將及請遷都避之蔡京見疏大怒嗾全臺劾靈素妖議遷都愚惑聖聽譖改釋教謗毀大臣靈素卽封還前後所賜出國門外上再宜復真人號不拜遂與祠溫州天慶觀惟皇城使張如晦弃官從之歸一日戒如晦曰可於扈興靈官山斷地五尺見石龜蛇則葬我葬畢宜急去夜三鼓援筆題曰四十五年勞生浮名薄利

時嶢要議神仙舊路中秋月下三更時風清月白但聞
雷震稽首而化計聞降勅賜祭詔守臣治葬斷地果如
其言卽下棺而走俄雲霧四合雷電晝晦惟亂石縱橫
失向所在矣靖康元年欽宗嘆舊事遣使伐其冢忽黑
風雷雨百恠出草莽間人不敢動使者仰天祈謝天始
霽欽宗聞之敬異復遣使降香加封通真冲虛妙濟真
人有青牛歌見遺文今無傳

葉道士

葉道士失其名淳安人素有道術能分形應供一日能

十家同時皆到。人始知其奇。一旦無病端坐而逝。其徒
卽爲棺斂。一鄉人遇之途。初不知其已死也。道士語曰。
今夕當雨。歸幸語吾徒。可收我西垣上。所晒屨。及歸。語
相對駭愕。走視西垣。屨儼然在上。急啓棺視之。惟冠屨
空衣如蟬蛻然。始知其尸解也。

吳基

吳基崇德人。厭吐人世。潛就道。味弃家雲遊。忽遇一道
士。視基微笑曰。此皮囊可脫也。何苦負之而走。基知其
異。再三相懇。遂授以導引之術。且囑曰。勤而行之。可以

度世基遂歸入千鄉金山原修煉幾三十年道成跌坐而化面頰體柔如生其徒收瘞之惟有布氈而已

黃十公

黃十公慶元之下管人嘗樵於仙桃山見二叟對奕得餘桃啖之觀奕未竟歸已三載遂居百花岩二十年後坐化石上

王思燕

王思燕字正夫麗水人天慶觀道士受上清法錄政和二年賜紫衣得養氣之術於西蜀李曼老紫氣溢於眉

間喜誦南華經得其旨趣士大夫與東之清談者
外之履常滿題所居室曰渾淪庵年九十餘趺坐而化

夏元鼎

夏元鼎字宗禹永嘉人自幼嗜學六經諸子三教九流
天文地志風角鳥占無不研解屢躋名場遂邁危疾有
教以吐納導引法乃差遂知藥在吾身不假外求乃徧
遊方外祈遇明師得關西宏先生授以道要遂歷湖湘
至南嶽祝融峯又遇赤城周真人於逆旅炷香皈依禮因
歷敘平生修真之要求其印證真人曰汝若是精切耶

世間所論皆常談耳我昔蒙西蜀鐵風洞聖師傳授全
盡付汝遂舉酒一斗鯨飲而盡因告以心傳之妙元鼎
大悟驚喜感泣真人曰汝已知藥物矣若火候幽微特
月出語汝及三鼓月上廼指天機造化玄妙之秘至夜
將旦元鼎就寢覺而失師所在門扃如故遂歸隱西山
未幾再遊幔亭諸峯一日歸家無疾端坐而逝是日鄉
人在閩中見之寄書歸家人以爲尸解號西城真人所
著有崔公藥鏡解陰符經註悟真篇講義味玄者多誦
法之

聖道者

聖道者不知何許人紹興初居蕭山淨土寺日乞食於市口每吐一珠如彈丸大光奪琥珀山玩掌中人飲獲取則懷吞之一日至山下指田中一穴語田父曰此有酒可飲田父飲之甚甘冽囑履之無竊發田父思飲往取之皆水耳忽一日乞薪市邸謂市媼曰我將去矣叩所之不答乃於常卧處火薪自焚人卽其地葬之後有見之於蜀者歸發其棺則尸解矣

宋晞

宋研號雪溪先生、世家雙流、遷於崇慶、紹興中爲閬中令、以仙去、後其孫德之聞在四明往訪焉、至雪竇山有蜀僧言聞諸耆老云、山後爛平山有二居士、其一宋宣教也、德之躋攀至爛平、果見丹竈而仙跡不可復尋矣、樓宣獻鎬爲賦楚詞以招之、國學博士楊琛爲之記、

周德方

周德方號廣莫子、計籌山真人杜處逸弟子也、性好學、所居室扁曰不自怨齋、坐卧一榻、積書數千卷、繙閱偶有得、則疏以別紙、歲久成巨帙、義理淹貫、心識融會、時

出以折疑問有儒者所未發性不飲酒日升堂一飯不出山餘二十年一日手書離形去智歸乎大通八字擲筆側身而逝異香滿室經宿不散

孫薪

孫薪字至豐麗水人元祐中以明經擢第授荆門軍教授不赴質性清介與黃葆光爲太學舊游宜和間黃以侍御史出守枯蒼薪不屑往見黃約會於洞溪僧舍贈以詩云勸農因到好溪頭把酒相看憶舊游三十年來如一夢可憐空負釣魚舟後年八十卒先是李若朴夢

新赴赤松館管轄里人亦夢幡幟來迎孫教授去翌日具衣冠端坐而逝

杜昇

杜昇不知何許人消才學得隱形解化之術入武林市上沙書龍字浮轉杯中叱起丈餘蜿蜒若小龍隱隱雲霧間呼之復下得錢及新衣輒與貧者嘗言樵牧杜孺休行死兵難當慈愛及人庶可免也後竟如言昇亦被殺有人遇之江浙湖南讀書如故人始悟其兵解五

王嗣昌

王嗣昌字玄悟自北海來望吳山五色雲趺坐頂上竟日衆異其貌遂編茅爲庵供茅君其中居之逮不下山常畫地爲獄囚妖矯輒之治病病愈不用醫也居三十年無疾朗吟而化

蔡道像

蔡道像不知其所從來博學通微遇異人得養生訣高宗南渡阻風祠茅君而濟見三絳人坐吳山頂上因拓庵爲觀使道像主焉祈禱輒應每建金籙齋輒有仙雀百餘盤旋醺壇之上因賜七寶以鎮其山年八十一坐

解所遣左右侍中貴劉鹿泉敖者感而弃俗封真人

白玉蟾

白玉蟾號海瓊子師陳翠虛佩琅書以神童爲神霄吏
名滿天下煉丹於錢塘之三一庵鬚頭跣足喜飲酒而
不見其醉嘗遊西湖暮忽墮水舟人驚尋不見達旦則
玉蟾坐水上猶醺然醉也一日有持刀脅之者玉蟾叱
之其人墮刀而走玉蟾召之曰汝來勿驚以刀還之時
稱玉蟾入水不濡逢兵不害後縱遊名山莫知所之或
云尸解於海豐

李菱

李菱字定國濟南人寓錢塘爲童子師一日往西湖淨慈寺過長橋忽於竹徑迷路見一道人林下斲笋菱揖之道人問所往曰將往淨慈道人曰未湏去且來同食燒笋食之甚美俄風雨晦暝失道人所在少頃雨止至寺門外卽覺身輕神逸行步如飛及歸邸不復飲食乃入蜀隱青城山其從兄李莫爲梓州路提刑使人至眉訪菱所在眉守報書數年前已輕舉乘雲而去今惟繪像存耳

盧葆真

盧葆真名仲綸麗水紫虛觀道士早遊名山遇異人得養生訣風格高爽心境虛靜年八十一於乾道三年六月三日作頌示衆坐小軒中揮扇而逝四體柔汗如生香氣與微風俱襲饒耆不設太史何公偶以詩憶之云不見仙人盧葆真洞前松竹幾經春白雲中斷來雙鶴彷彿悲鳴是故人

徐泰定

徐泰定字虛寂紫虛觀道士屬禧初居松陽之觀行庵

庵在萬山中。人跡罕到。一日忽有吹雙笛道人至。庵與
秦定語相合。授以丹訣。仍贈筆一枝。令作水墨山水。秦
定謝不能。道人曰。但隨意爲之。遂畫如素習。後十年。道
人欲挾之遠遊。秦定辭。乃留詩別去。鐵笛雙吹。破曉烟
相逢。又是十年前。曾將物外無窮意。總付毫端不盡傳。
白髮數莖君老矣。青雲一朶我飄然。世間究竟只如此。
何似同歸洞府天。秦定年八十餘。常童顏。端坐而逝。吹
笛道人自稱李洞明。疑卽呂洞賓云。

皇甫坦亡其里居嘗得丹訣於朱桃椎久之復得
能斷地出泉布氣生枯枿因入顯仁太后夢召之醫且
虛呵翳落及起妃嬪留扇治瘡皆驗而高宗又善所對
無爲爲治之語賚錫甚厚坦潛置卧榻而去不受也兩
朝四徵館之西湖顯應觀俄進奏群衆泊然尸解天燈
仙崔旋繞藏室

葉文詩

葉文詩麗水人本儒家子爲天慶觀道士時稱葉書記
嗜酒善詩画山水人物閉戶輒累月不出出則羣兒環

之或與之錢與之衣則悉與路人每嚴寒浴於溪寶祐
甲寅十二月旦浴於觀池擲其衣獨臂二草屨作偈云
似癡非癡似醉非醉竹杖芒鞋落魄半世噴清風明月
逍遙流水白雲自在端坐靜室而逝既葬人或過於路
跡之竟不見時皆以爲仙云

陳明

陳明黃陵舖兵也人呼爲陳院長年三十五時犯罪受
杖遂達頭跣足若病狂者往來行歌無定止頗能知未
來事雪中不掛一縷卧野橋上氣勝如蒸眼色正碧好

以白堊書地且讀且歌字畫類五銖錢文觀者莫識中
貴與領擯官者憐其寒常遺以衣乃轉與貧者淳熙八
年郡中久不雨或叩以豐歉應曰水災竹災魚災貧道
災俄而山發洪水水暴至所經竹木盡拔魚鯨漂流明
大病不食數月腹皮皆凹人附骨隱隱見五臟人謂其
必死俄復如初有蜀客來見之焚香作禮曰先生正爲
鄉里募緣造橋安得來止衆始悟其爲異人神遊於蜀
云或問其庚但云三十五後微疾而終藁葬溪岸未幾
其徒發瘞將火之空無一物

章思廉

章思廉，遂昌人，名居簡，以字行。少業儒，以經學名。三舍既有悟達，橫跡於邑之壽光宮，終日默坐蓬頭垢面，出則步履如飛，動作語言皆禍福所寓。一時以神人待之。宋高宗遣黃門董御藥，齎香致禱，大書其姓名，乃在位授之。未幾，孝宗受內禪，蓋慎乃孝宗名也。乾道丙戌，郡守錢竿迎舍郡齋，兩月不粒食，惟日飲醇酒，忽出遊半日而歸。因問曰：洞賓何在？答曰：正在張公橋洗紙被竿，即命駕往謁之。至則不見，若有聞曰：此思廉小兒饒舌。一日

諸竿曰吾欲歸乃端坐而逝昇至天慶觀七日顏澤不
改越八日瘞少微山後有人見其持隻屨在東陽洞邊
釣魚發其瘞唯隻屨存嘗有詩曰得太極全體見本來
面目先天一點真後天却是屋

李鼻涕

李鼻涕遺其名紹興時來居秀州踪跡奇詭似有道者
或從求藥則以鼻涕和身垢爲丸與之人信而服之者
輒效因以鼻涕名之劉延仲嘗與往來一日與坐曰今
日偶無酒不能醉客奈何李曰何不出床頭珍珠泉劉

大笑呼童取尊李曰不必取尊但將一空瓶紙覆之少頃香氣外溢坐中皆醉去明日劉有他客命啟珍味泉則空中無有矣久之忽詣劉別云後二十年當於真州相見至期劉卒於真州

朱希常

朱希常青田海西人住梅溪學老子術政和間從洞玄妙應先生吳應能人內祈禱上嘉之賜號凝妙大師未幾辭歸築庵於連雲山名曰南華庵丹成尸解而去其丹井與手植花木至今猶有存者

車四

車四不知何處人青巾布袍修髯偉幹有黃白鬚好飲酒一吸數斗不醉常往來西湖山水間時蔡京爲錢塘尉往依之一日隨京至新村是夜堅求同宿令京處外以蔽之京疑其大盜也故藉尉以蔽然業已同寢坦然無慮鼾聲如雷中夜風雨大作聞空中喧呼曰車四安在一人曰在此若數十人排闥入者至牀將擒之忽一人曰恐驚床外人以致帝怒奈何若遲疑者頃之歎曰又被他躲過六十年了也俄聞獨楮數萬番聲車四躍

起謝京曰非公極富貴安能免此番厄寔當無慮及明
辭去以乾禾術授京京笑曰身荷富貴何患無財安用
此力辭不受車四舉手辭謝忽然不見後京子脩宸越
卒顧車四以免曰寄語太師吾車四也特來報新村之
德耳

髻髻道人

錢塘周反璩與趙師秀以詩名一時春日嘗偕數同社
薄游湖山極飲西泠橋酒壚皆大醉偃卧忽一髻髻道
人過而哂之曰詩仙醉耶酒家善看客我當代賞酒債

索水一小盃以瓢中少藥投之。口喀嗽。冥之地上。則皆
精銀也。時遊人方盛。皆環視駭歎。忽失道人所在。及暮
諸詩人始醒。酒家語之故。皆悵然自失。其家持銀往市
得錢正可酬所值。了無贏餘。明日喧傳都下。酒家圖其
事於壁。題爲遇仙酒肆好事者競趨之。遂爲湖山旗亭
之冠。

清音子

清音子。姓湯名道亨。復自號赤脚道人。宋季引一簞。云
自金陵來。處茅椒於秀州府北。鄉大鄉人。能主給食事。

每夜坐時頂中出光照耀一室。州人推異爭飯之。豐澤不謝第言分定去。由是州人益異之。施與日多。因攜庵以居。名曰太古。以延竚四方雲水之士。久之有市人戲烹其糲食之。亨卽咨嗟若不勝。卽與所知訣別。手書一偈云。八十一年饒舌。終日化緣。不歇重陽時節。歸寒一路。清風明月。遂端居而化。

呂處仁

呂處仁。餘姚人。嘉定間隱居四明山中。得異術。積雨及爲人所譏。輒驗。尊爲演教真人。及化去。以劍投於後。積

潭至今每風月清朗之夕其劍時時飛出

葉道士

葉道士不知其名自云龍舒人不食五味年九十餘平生未嘗有疾居會稽舜山天將寒必增屋瓦補牆壁下帷設簾多儲薪炭杜門終日及春乃出弟子小道人極愿慙嘗歸淮南省親至七月望日有住庵隣僧召道士飯飯已亟辭歸問其故曰小道人約今日歸耳僧笑曰相去二三十里豈能必如約哉道士曰此予平日未嘗妄語也僧乃送之歸及門小道人已弛擔矣客每訪之

拱揖甚謹。然不肯多語。或默以未意而已。人欲知其所得。纔到門。卽引入。辟內燒香。具道其遇師本末。若先知者。人以是異之。後不知其所養。

沈若濟

沈若濟字子舟。錢塘人。通三氏書。尤長於醫。懸壺茅山。施藥刀圭。人口無不霍然。道君稱名。賜號洞元真人。後服丹尸解。

葉梅卿

葉梅卿壽昌人。明春秋通史傳。理宗朝任撫屬舍人。後

棄官家居。習修煉導引之法。有異術。能存神謁帝。一日作偈示衆。恬然而化。將歛。顏色如生。後昇葬。衆疑其輕。啓棺視之。惟衣裳在焉。

張復陽

張復陽。平湖人。自言是張果老後身。弃家爲道士。妻亦感悟。爲尼。復陽修煉精勤。明周易如復之旨。作復陽圖。善詩。畫。書。法。道。美。年八十餘。顏澤不枯。步履輕捷。卒之日。體柔如生。人謂尸解云。

賣柑老人

宋端平間有老人寓嘉興逆旅日出金柑易醉月餘不竭主人恠之暮窺其室用鼎盛土下柑種久之柑實纍纍垂矣主人邀飲願授其術老人曰此太上養道法給身有餘養家不足不可輕泄主人拜乞伏地不起老人曰願往深山乃可授耳主人因私念得此術一夕種數十林便可致富卽爲老人所覺明晨覓之不見門扃如故主人悵然明年或見老人於廬州市上賣枇杷

武元照

武元照蕭山女子也方孩時母或食肉卽終日不乳及

禁食乃乳母異之後及筭議適人女不從忽夜夢神人
命絕食及覺遂欲不食母強食之則夢神怒曰何違君
戒也剖腹深之因授靈寶法自是不復食以符水療人
疾如響應一日忽詣數十家聚話後往其家訪之云
死矣其死日正分詣之日也

妙靖鍊師

妙靖鍊師陳氏女名瓊玉年十九與姊浣於澗中得桃
實大如拳啖之從此不復火食惟飲酒啖生果初不識
字忽能詩辭爲人言禍福悉驗一日邀其兄遊四明海

中兄乘舟而已行水上附數日水不濡諱兄曰我知來事恐泄天機姑以風花雪月爲諱而寓意其中術闢庚和七年召見賜號妙靖鍊師乞還山賜肩輿教遣壽九十端坐而逝

唐廣真

唐廣真嚴州人既嫁而得血疾夢道人與藥服之而愈自是與夫隔絕從師修道得遇何仙姑至宋淳熙中方在隣家會食次若有人喚者出門逢三仙人引至海邊跨大蝦蟇渡海因隨三仙人遊諸名山一仙人問曰汝

欲超凡入聖耶。留形住世耶。棄骨成仙耶。對曰。老母在。願終奉養。曰。如是。且留形住世。遂與丹一粒吞之。自是不火食。後召入德壽宮。封寂靜凝佛真人。母卒。不知所之。

蛇姑

蛇姑不知何許人。居臨海後嶺之巔。樵者見之以告居人。忻生。生往訪焉。見庵畔有一蛇。護守。遇不善人至。則逐之。故號蛇姑。邑人張得一往謁。授之訣曰。心湛湛而無動氣。綿綿而無制精。涓涓而通轉神。混混而往來。得

一、晏然解悟、遂遊方不歸、久之始亦化云。

陳氏

陳氏義烏農家女、嘗着屐上大楓杪、了無危懼、頌曰：我爲仙、今日便長去、惟左蒼右黃、當暫歸耳。家人悉出、拜訣、於是飄然輕舉、極睇乃沒。

元 共十七人

金正韶

金正韶字九成、餘杭人、早歲師舒桂林於石室洞、讀書十餘年、度宗召爲龍翔宮書記、至元間、詔入武庫、授太

洞晨觀講究性理之學將解化留偈別同袍而去

陳嘉

陳嘉字志謨諸暨人文辭超邁然佯狂不羈每應舉主司輒喜其文第中必雜狂語輒以怒去於是弃去一意玄修自號龍壇居士後與沃州山道人尸解去

劉大彬

劉大彬錢塘人隱居茅山延祐間得九老仙都君玉印仁宗卽以賜之加號洞觀微妙玄應真人作茅山志三卷張伯雨爲之書尋蛻骨於華陽洞中

張悌

張悌字信甫，居鄆之象山，傲兀烟霞，自號曰無爲子。象山在大瀛海間，多陶隱君司馬子微之遺跡，無爲子早從方士習聞長生久視之說，旣壯，出遊南粵北燕，回薄萬里，愛武當神明之奧，鍊形服氣，莫此爲宜，遂歸與妻子訣，妻子不從，乃中夜引刀截髮，留之枕畔，解故衣，披布衲，偃屣，着行滕，佩鉢囊，侵曉掉臂出門徑去。上武當，止紫霄宮，師事張真人，執弟子役。真人啓之道要，署爲首衆，無爲子晝則服勞薪水，與衆同甘苦，滋味取其至。

薄者夜則危坐一榻脇不至席者三年忽晨起別衆曰
我將歸去衆方惟之卽泊然而化

徐弘道

徐弘道錢塘人號洞陽子修真瑞石山年八十三沐浴
更衣書頌而蛻有不離本性卽神仙之語得法弟子丁
野雀也弘道常感張平叔住山傳訣故庵名紫陽云

丁野雀

丁野雀錢塘人師事徐洞陽潛修密証不露風采鄉人
視之以爲一鄙樸道人而已元宵夜偶與鄉人集共言

蘇州燈盛野雀笑曰諸公有意從觀乎皆令閉門以須
目開燈見正在與關門外也衆領野雀忽不見時已歷
叩衆家語其故矣久之衆歸急往謝之野雀笑曰更能
致事雀爲諸公娛衆舉目忽仙雀盤繞衆爭起插雀有
得者皆繼化也雀鳴人喧忽失野雀急排室覓之已作
松雀坐而化衆遂漆其身祀焉先是野雀召其妻王守
素付之偈云嬾散六十三妙用無人識順逆兩俱忘虛
空鎮長寂妻感其言亦爲女冠二十年不下山亦仙去

周頤真

周頤真字養玄永嘉人幼穎異能畫周易方員二圖年
未弱冠遇西蜀異人授以隱書及壬遁反閉之術因自
號山雷子復從開元觀道士蔡術嗣靈寶法凡玄學運
用悉以易變通之神化無方人莫能測元統甲戌歲旱
郡請禱雨頤真默運神機電出袖中雷雨隨至未幾有
訐其左道惑衆者捕之急頤真挺身立州橋石欄側終
日捕者旁午莫得見有司知其神始獲免一日忽命筆
書偈云我從空來我卽空我向空歸空自在八十五年
幻化空非幻不化空不改曉豁達大空空不空一輪紅

氏古今同。擲筆而寂。世稱蘭室先生。所著有淵澤老人集。行於世。

央北子

央北子。姓蔣氏。嘉興人。年二十五。涉獵經史。言辭簡遠。擊首垢面。動靜不羈。元至正初。抵松江。坐太古園室。已則歷市廛。狂走。人盡呼爲風子。一夕叩沈蒲團門。大呼曰。將蒲團來坐我。沈異之。攜一蒲團導詣蔬圃芥草中。坐地。沈徐徐暱啓之。有所省發。遂委俗傾身。服役爲弟子。由是庶方崇向。爭施與。因以其地爲庵。融然一室足。

不踰闔者三年嘗有問者曰近思錄云然後始有光明
是金丹否。坎北子曰賢且去味。中庸又嘗手書示沈曰
萬紫千紅總是春。何須饒舌問東君。啞人得夢向誰說
豎起空拳指白雲。又云不偏不倚立於中。不着兩邊不
着東。超出東西南北外。一毫頭上釣蒼龍。一日語沈曰
吾乘化盡矣。若等勉之言絕而蛻。

王應璩

王應璩錢塘人。出家佐聖觀。事父母極孝。張伯雨楊維
禎俞子中高其行。與爲方外交。受錄張天師。領諸神師。

採邑早呼雨。若涕唾平居。種藥洗竹。聽笙調。雀而已。天師號之曰高士真人。

劉雲心

劉雲心名德邵。麗水人。學道於妙成觀。善鼓琴賦詩。精意玄修。郡有疾病水旱。必禱之。謝遺俱惠。貧屢平居。無長物。眉間有七黑子。若北斗狀。一日忽語弟子曰。吾將於某日逝矣。至期沐浴坐於正室。索筆書偈。然然而逝。

周元利

周元利字謙甫。仁和人。初生有雷殷殷發地下。隣里驚。

異及生而目有神光年十八出家大滌山師冲妙先生
性純謹作詩無塵俗氣咸淳間遷居太乙宮與褚雪嶽
郭似山爲方外友尋避地山谷間端坐而逝

羅少微

羅少微不知其所從來寓居紫陽宮一夕大雪與丁秀
才輩擁爐夜坐秀才忽歎曰如此好雪安得肥羊美酒
以消之少微笑曰是特易耳卽踏雪出門不數步手
携熟羊一肩銀盒貯酒而至曰此卽庖物也相與歡飲
極醉少微忽擲劍騰空而去衆始知其爲仙云

杜道堅

杜道堅號南谷子風度清雅見元世祖陳養身安民之道
春賚殊厚主昇元觀與鄧元祐校讐羣書築老君臺
於宗陽宮集儒彥賦詩一時推爲社長晚蛻去舉衣屨
葬計籌山下

王壽衍

王壽衍字眉叟有學行至治初徵授弘文輔導粹德真
人領開元宮虞楊范揭四君子皆與善嘗爲名士劉時
中治喪撫其孤葬近壽穴便拜掃其篤友誼如此尤羽

流之不多見者、後無疾端坐而化。

吳全節

吳全節不知何許人、嘗奉詔訪異人、建紫瓊觀、久居錢塘、以禱祠被眷、薦異、澄進象山錄、脫其奴籍、每日欲知顏子如愚處、正在羲皇未畫前、蓋悟道於易者、未幾他去。

阮日益

阮日益於潛人、受度於天目玄雷山真慶觀、霍形古貌、攻苦食淡、徧游湖海、晚遇異人授修煉服餌之訣、性命

雙修超然玄悟兀坐於天目石岩中四十年寒暑不出至元間年八十餘無疾端坐而逝

貝守一

貝守一餘杭人博通經史靈一先生初洞晨觀命開山久之遷九鎖外山庵好吟咏蔬食飲水一布衲二十年不改操年八十二作偈示衆泊然而化

明 共一十八人

彭素雲

彭素雲汝陽人年十二禮劉月淵爲師稍長遊武當時

張真人集雲水三千餘人於紫霄宮素雲求執厨汲水
苦行三年得真人授棲神鍊氣之旨走蜀上青城入閬
登武夷凡古仙過化處歷覽殆徧東浮漸水陟天目過
華亭擇勝棲止洪武初始至桐林結茆居之閉影不出
幾二十年一日旦起沐浴更衣跌坐問弟子曰何時日
正中遂翛然而化七日顏色如生太祖皇帝適命中
官來召以羽化對越月復命中官啓其窺視之正身不
歆太祖歎異復命有司加甓以重甃其墓

張三丰

張三丰遼東懿州人名君實字玄玄生有異質龜形崔骨大耳環眼鬚髯戟張頂作一髻手持刀尺一衣去袖寒暑御之不飾邊幅人呼爲張邈邈日行千里靜則瞑目旬日所啖斗升輒盡或辟穀數月自若也元末居寶雞金臺留頌而化臨葬聞棺中有聲發視之復生乃入蜀洪武初至太和山修煉結庵於玉虛宮庵前古木五株三丰棲其下後人武當時時語人云茲山以真人應世異日當大顯於天下人亦不之信一旦拂衣去未幾成祖果命胡濙物色之不見遂勅武當建宮以俟三丰

知之遂隱見其踪跡縱遊湖海間嘗爲正一天師郵書
張守常守常惟其墨潤闕後山尋其跡至寶極觀遇之
居歲餘知胡滌將至竟遁去後不知其所終

張守常

張守常錢塘人爲三茅觀道士一意玄修以勤苦聞人
多重之爭爲施予守常得所施未嘗私一文卽爲修葺
觀宇感張三丰降其室日與談玄便爾通靈一日誦黃
庭經聞異香滿室而化舉棺若空蓋尸解云

趙緣督先生

趙緣督先生名友欽，鄱陽人。少有志於事功，凡遁甲、韜鈴、天文、曆筭之學，靡不精究。一日遊芝山酒肆中，遇一丈人，方瞳綠髮，與飲酒。且曰：爾來何遲也？旣而盡出懷中冊書授之，臨別曰：吾扶風石得之也。蓋世傳杏林真人者，先生遂無意世事，隱處海濱者二十年。註周易數萬言，識者多以爲發前人所未發。先生嘗乘青驪，從小蒼頭往來衢婺山水間，客中無所資而用，未嘗乏卽不知其何術。倦游而休，飄然坐逝於龍游之雞鳴山。當是時，宋景濂、趙劉伯溫皆從之游，且稱先生學貫天。

人之際而王華川稊至手校其所註周易以行於世云

周思得

周思得錢塘人受天心五雷正法。太宗皇帝聞其名。

召談青巖特建天將廟勅思得與將共居宵扈從北征。後王靈官鞭虎前驅虜見之大驚遁去殺獲過當尸橫遍野時當炎月穢氣觸人思得禱雪覆之六軍皆悅常歷事四朝寵眷優渥。英宗尤爲傾注還山尸解年九十有三。論祭廟號勅葬於八盤嶺下。

唐秩

唐扶少司空唐胄子得大梵斗母五雷法用報父管下
獄姜御史訪薦於朝以擢火除官妖受賞及命禱雨雪
輒應授太常博士既罷來遊武林祈雨於祐聖觀運旗
摩空雲轉如輪雨隨如注偶被疾忱見幢蓋來迎遂化
去已歸其蛻三年矣忽市叢中從稚幼文索所借書以
誦得法弟子李一正正太駭異後又拯四孝燕之溺曰
帝命主治袁州因祠祀之

白蛇

法旌相廬人病蛇目以蛇名家貧操舟濟渡不索人錢

與之則受。隔岸一道士。暮夜呼渡。駝急起就之。無所見。傾之又呼。繼往又無所見。投筭將行。蹉跌而仆。亦無怨言。迨起則駝背已直矣。時人異之。越數載。死舟中。家人收殮。久之。隣人至衢州。見駝與道士同行。欵洽若平時。囑寄所穿鞋以歸。又與之以屐。令着之。則行步如飛。不日至家。以鞋付其妻。視之。故歛時物也。啓冢。惟折筭在焉。回顧所貽屐。化爲雙鵲。冲天而去。

施舉

施舉。縉雲人。學道妙成。觀深得洞玄之旨。侍於法席者。

甚衆教主張真人重其名寫紫霞山房圖以贈之洪武中其徒王以節爲樂舞生連坐軍士以繩攀杖擊促其行繩杖俱自解折捕者驚異赴京得釋而歸永樂元年壽八十四一日語其徒曰往來合散理之自然我將歸矣遂瞑坐而逝

徐道彰

徐道彰錢塘人生有仙姿通清微靈寶五雷諸法養神通玄觀每旱潦禮政有所輒應時爲人談說雷奧聽者神悚除妖驅邪及採三光復嬰兒之明人咸異之受施

卽管妙庭幽潔絕塵後沐浴解化羣雀繞空迎之而去
金九先生

金九先生會稽人弘治間住方泉橋生平不巾幘服垢
衲人呼爲金蓬頭喜作詩一日在青塘村幻出一舍有
女織其中與金賡和已忽不見又嘗於武林遇道者其
飲已而渡江道者擲雙屨令渡金難之屨忽化爲舟道
者竟渡金遂返過所飲肆譁聚百餘人云道者所屨杯
膠不可啓金至爭令啓之中有洞賓二字

郁存方

郁存方錢塘人徐道彰法孫也母夢霍鳴於室而生及長風神散朗有包舉八荒之意忽遇一異人撫之曰此吾道之傑也既受諸階法祈禳盡驗歲大旱郡守請之祈雨乃封潭後將捲湖水洒城中鴛瓦魚躍嗣天師張真人命捕鼠妖召吏兵與戰立擒之年七十九無疾遁

陸瓚

陸瓚蘭谿人生有仙骨碧眼蒼髯身長九尺餘濶步紆徐頃刻數十里性格不凡耽於修真斷緣息念雖處家庭紛沓若不見聞每閉戶冥坐旬月不食人莫窺其際

有士人叩之曰聞先生得道之真果內與坤外與乾等
云獨言其外不可以言道獨言其內不可以言道士人
歎服三十後徧遊京師及諸遠方人稱之爲陸長仙後
自外一歸絕口不問家事坐卧一小樓歷旬日復去竟
不知其所終

俞大彰

俞大彰錢塘人修煉於重陽庵有道術每旱潦求之祈
雨雨至祈晴日生反覆陰陽於呼吸間人以真仙稱之
一日無疾而逝後有見之金陵者其顏色更少云

閻蓬頭

閻蓬頭不知何許人。居雷峯最久。冬浴冰。暑坐溺甕中。出而曝之。無穢氣。一日坐逝。毛百戶家。百日顏貌如生。初有人叩其所得者。徐答曰。窮理盡性。以至於命。齊家治國平天下而已。

葫蘆道人

張柏亭。衡之西安人。亡其名。爲玄妙觀都紀。永樂間。奉勅建武當山宮觀。柏亭應詔。住玄天玉虛宮。時遇異人。授以葫蘆拄杖。各一。常施藥。并五雷正法。抹濟祈禱。輒

驗後還衢日跨青牛出入自號葫蘆道人一日語其徒衆曰我以某日某時歸山至期果端坐而化

許源

許源不知所自棄武爵避仇自滇游蜀遇藍斗篷得訣居斗牛宮俄南來修煉表忠觀傍以却病方致貴游而實承王馬之派變容貌於頃臾若八公年一百八歲書頌蛻去

潘自然

潘自然松陽逍遙觀道士居雲岩善符咒燒煉之術號

召風雷及神將出現。每夜有神燈懸掛於門。當出行。卽有神燈前導。自然管他出。有求符者。情辭迫切。勢不能待。自然一執。費老人憐之。遽呼神將承命往治。自然歸。貴老人奈何。輕遣神將。忽泥塑滕申君。詣前曰。彼五世法官。偶有過。上帝謫下。以待公。廬公僅三世法。非彼若母。責爾也。語畢。卽退。步行復其位。老人遂不復見。自然後亦仙去。

祝小仙

祝小仙。粵人。來游西湖。寓於藕花居。藕花居者。高相公

儀之別業也。儀一日訪之小仙曰：汝卧此，汝卧此，儀未幾卒，竟築其地爲墓。自稱無山，視貴游如土芥。蓋神龜之子，黃頰通靈者也。後尸解。三聖橋復有遇諸粵者，曰：爲我寄聲，以謝武林諸舊好云。

兩浙名賢外錄卷二終